

Erngup nukingata innaallagissiornermut atorineqartarnera pillugu Inatsisartut inatsisaat

Kapitali 1

Atuuffa

§ 1. Inatsisartut inatsisaat erngup nukinganit isumalluutit innaallagissiornermut atuinermit atorineqassaaq.

§ 2. Inatsisartut inatsisaat erngup nukinganit isumalluutit, ukiumut 1 megawatt (MW) taannaluunniit sinnerlugu pilersuisinnaasutut nalilerneqartunut atorineqassaaq.

Kapitali 2

Misissueqqaarnerit atuinerlu

§ 3. Erngup nukinganit isumalluutit innaallagissiornermut atorineqarnissaanut misissueqqaarnernut atuinernullu Namminersorlutik Oqartussat kisermaassisinnaatitaapput.

§ 4. Erngup nukinganit isumalluutit innaallagissiornermut atorineqarnissaanut misissueqqaarnissamut imaluunniit atuinissamut Naalakkersuisut akuersissuteqarsinnaapput.

Imm. 2. Atortussiassanik aatsitassanik pisunik atuinermit atatillugu nukissamik tunisassiorinissamut erngup nukinganit isumalluutit misissueqqaarnissamut atuinissamullu akuersissutit, suliani taamaattuni oqartussaasut suliaqarnerinut tamarmiusumut atasutut Naalakkersuisunit nalunaarutigineqassapput. Taamaattorli erngup nukinganit isumalluutit atuinissamut akuersissut aalajangersimasooq Inatsisartut inatsisaat manna malillugu suliarineqassaaq.

Imm. 3. Misissueqqaarnissamut imaluunniit atuinissamut akuersissutit malillugit suliaqarnerit Inatsisartut inatsisaat manna, tassunga atatillugu atugassarititaasussatut aalajangersarneqartut aammalu inatsisit allat sukkulluunniit atuuttut naapertorlugit ingerlanneqassapput.

Imm. 4. Qinnuteqartut ataasiakkaat erngup nukinganit isumalluutit pineqartut ilaannaanik atuisussatut naatsorsuutigineqarpata, qinnuteqartunut arlalinnut ataatsikkut imm. 1 malillugu akuersissutit Naalakkersuisut nalunaaruteqarsinnaapput.

§ 5. Misissueqqaarnissamut akuersissutit erngup nukinganit isumalluutit aalajangersimasunut, nunataanilu killeqarfiliussat iluanni atuuttussanngorlugit, aammalu atugassarititaasut Naalakkersuisunit aalajangersarneqarsimasut tunngavigalugit nalunaarutigineqartassapput.

Imm. 2. Misissueqqaarnissamut akuersissutit ukiut pingasut tikillugit kisermaassisinnaatitaaffinngorlugit tunniunneqassapput.

Imm. 3. Pisinnaatitaaffimmik pigisaqartup misissueqqaarnernik ingerlatserneermi kingorna qinnuteqaammi suliaasaq nassuiaatigineqartoq naammassisinnaappagu, pisinnaatitaaffimmik pigisaqartoq tamanna pillugu atugassarititaasut naammassineqarsinappata atuinissamut akuersissummik

tunineqartussaataavoq. Pisinnaatitaaffimmik pigisaqartoq kingusinnerpaamik misissueqqaarnissamut akuersissutip atorunnaarneraniit ukiup ataatsip qaangiunnerani qinnuteqassaaq.

Imm. 4. Misissueqqaarnissanut pisinnaatitaaffeqartoq piffissap misissueqqaarnissamut akuersissuteqarfusup naaneraniit kingusinnerpaamik ukiup ataatsip qaangiunnerani atuinissamut akuersissummik qinnuteqarsimanngippat, ingerlatseqatigiiffimmu allamut misissueqqaarnissamut akuersissummik Naalakkersuisut tunniussisinnapput.

§ 6. Erngup nukinganit isumalluutini misissueqqaarnermut atatillugu paasissutissat pissarsiarineqartut katersorneqartulluunniit tamaasa pisinnaatitaaffimmik pigisaqartup kingusinnerpaamik akuersissutip atorunnaarnerani Naalakkersuisunut nassiutissavai.

Imm. 2. Paasissutissat, tak. imm. 1, misissueqqaarnissamut akuersissutip inaarutaasup atorunnaarneraniit ukiuni pingasuni tamanit takuneqarsinnaassanngillat.

Imm. 3. Misissueqqaarnissamut akuersissutip atorunnaarneraniit ukiut pingasut qaangiunnerini paasissutissat, tak. imm. 1, misissueqqaarnissamut akuersissummik piginnittumut akiliinertaqanngitsumik qinnutiginerisigut tamanit takuneqarsinnaalissapput.

§ 7. Atuinissamut akuersissutit erngup nukinganit isumalluutitut aalajangersimasunut, nunataanilu killeqarfiliussat iluanni atuuttussanngorlugit, aammalu atugassarititaasut allat Naalakkersuisunit aalajangersarneqarsimasut tunngavigalugit nalunaarutigineqartassapput.

Imm. 2. Atuinissamut akuersissutit atugassarititaasussat tunngavigalugit nalunaarutigineqartassapput, ilanngullugit innaallagissiassaq minnerpaaffissalerlugu annerpaaffissalerluguluunniit aamma imermik atuinissaq minnerpaaffissalerlugu annerpaaffissalerluguluunniit.

Imm. 3. Atuinissamut akuersissut ukiut 40-t tikillugit kisermaassisinnaatitaaffiusumik tunniunneqarsinnaavoq, taamaattoorli takuuk § 10, imm. 2.

Imm. 4. Imm. 3 malillugu atuinissamut akuersissutip piffissaq atuuffissaa, qinnuteqartup piffissaq eqqarsaatigalugu pisariaqartitatut uppersarsagai aallaavigalugit aalajangerneqassaaq.

Kapitali 3

Piumasaqaatit atugassarititaasullu

§ 8. Misissueqqaarnissamut aamma atuinissamut akuersissut suliffeqarfinnut namminersortitanut, piginneqatigiiffinnut aktiaatileqatigiiffinnulluunniit kiisalu ingerlatseqatigiiffioriaatsinut assingusunut, Inatsisartut inatsisaat manna naapertorlugu misissueqqaarnissamut atuinissamullu akuersissut tunngavigalugu suliaqartunut tunniunneqarsinnaavoq. Ingerlatseqatigiiffiit Kalaallit Nunaanni angerlarsimaffeqartuussapput.

Imm. 2. Naalakkersuisut piffissami misissueqqaarfusumi pisinnaatitaaffimmi pigisaqartup Kalaallit Nunaanni angerlarsimaffeqarnissaanik aalajangersakkap saneqqunneqarnissaa pillugu aalajangiisinnapput.

Imm. 3. Atuinissamik akuersissummik tunineqartoq aammattaaq erngup nukinganik innaallagissiorfimmik, atortunillu tassunga atasunik tamanit piginnittuussaaq, taakkunungalu ilaapput akuersissutitut nalunaarutigineqartoq naapertorlugu innaallagissiornermi atorneqartussat sapusiat, ikerasaliat, sulluliat, tasinngortaliat, ruujorit, turbinit, pilersuineri akqusersuutit il.il. Tassani pineqanngillat erngup nukinganik innaallagissiorfiit atortullu tassunga atasut Namminersorlutik Oqartussanit tiguserup kingorna attartortinneqartut.

Imm. 4. Misissueqqaarnerit atuinerillu pinnginnerini, aammalu iliuusissat tamatuminnga siunertaqartut aallartinneqannginnerini suliaqarnissanut pilersaarutit Naalakkersuisunit akuerineqarsimassapput.

§ 9. Erngup nukinganit isumalluutit innaallagissiornermut atorneqarnissaannut misissueqqaarnissamut atuinissamullu akuersinissamut atugassarititaasussat pillugit Naalakkersuisut aalajangersaasinnaapput. Innaallagissiaq atorneqartussamit sinneruttoq pillugu kiisalu innaallagissiap ilaa tamanut pilersuinermit immikkoortinneqartussatut pisussaaffiliissutaasinnaasoq pillugit maleruagassanik Naalakkersuisut aalajangersaasinnaapput. Tamatuma saniatigut Naalakkersuisut pinngitsaaliisummik isumaqatigiisitsiniartarnek pillugu maleruagassanik aalajangersaasinnaapput.

Imm. 2. Maleruagassat imm. 1 naapertorlugu aalajangersarneqarsimasut, aatsitassanit pisuussutini misissueqqaarnermut, misissuinermit piiaanermullu atatillugu saneqqunneqarsinnaapput. Inatsimmi matumani § 4, imm. 2 naapertorlugu erngup nukinganit isumalluutini atuinissamut akuersissutit tunniunneqareernerata kingorna, atortussiassanik aatsitassanit pisunik piiaanermut atatillugu erngup nukinganik innaallagissiorfiit Naalakkersuisunit inatsit atortussiassanik aatsitassanit pisunik misissuinnissamut piiaanissamullu akuersissutitut tunniussinermit tunngaviusoq naapertorlugu akuerineqartassapput.

Imm. 3. Inatsisartut inatsisaat manna naapertorlugu misissueqqaarnissamut atuinissamulluunniit akuersissutit oqartussaasunit kikkunnilluunniit suliarineqarnerannut atatillugu pisinnaatitaaffinnik pigisaqartup akitsuutini akiliisarnissaa pillugu Naalakkersuisut maleruagassiorsinnaapput. Akitsuut oqartussaasut suliarinninnerannut atukkanut aningaasartuutit eqqarsaatigalugit aalajangersarneqassaaq, ilanngullugit nakkutilliinermit avataaniillu ikiorserneqarnermut aningaasartuutitut matusissutissat.

Imm. 4. Pisinnaatitaaffimmik pigisaqartoq akitsuutini qanoq annertussusilinnik oqartussaasunut akiliisassanersoq, atuinissamut akuersissummi aalajangersarneqartassaaq. Taassuma ataani akitsuutit ukiumoortumik akilerneqartussat, erngup nukinganit isumalluutit akuersissummi pineqartut angissusiat tunngavigalugu naatsorsorneqartoq aalajangersarneqartassaaq. Taamatuttaaq akitsuutit, erngup nukinganit isumalluutini atuinerpiaq tunngavigalugu naatsorsorneqartut pillugit atugassarititaasut, imaluunniit oqartussaasut suliaasamut pineqartumut akuersissummit aningaasaqarnikkut iluanaarutissaannik akiliinnissamut atugassarititaasut aalajangersarneqarsinnaapput.

Imm. 5. Misissueqqaarnissamut imaluunniit atuinissamut akuersissut qanoq pisoqarnerani annaaneqartassanersoq imaluunniit Naalakkersuisunit utertinneqartassanersoq pillugit Naalakkersuisut maleruagassiorsinnaapput. Atugassarititaasut akuersissummi aalajangersimasumi takuneqarsinnaassapput.

Kapitali 4

Atuinissamut akuersissutit isumaqatiginninniutigineqaqqittarnera

§ 10. Atuinissamik akuersissummut piffissaliussap affaata ingerlareernerani akuersissummik pigisaqartoq Naalakkersuisullu, piffissap atuinissamik akuersissuteqarfusup naanerata kingorna piffissaq atorneqartussaq pillugu isumaqatiginninniarnernik aallartitsissapput. Taamaattorli isumaqatiginninniarnert akuersissutit atorunnaarnissaanut ukiut qulit sinnerunneranni aatsaat aallartinneqartariaqarput.

Imm. 2. Atuinissamik akuersissutit ukiut 20-t tikillugit sivitsoqqinnissaanik Naalakkersuisut akuersissuteqarsinnaapput, tamatuma kingorna akuersissut sivitsoqqinneqarsinnaanngilaq. Erngup nukinganik innaallagissiorfik Namminersorlutik Oqartussanut akeqanngitsumik tunniunneqassasoq

Naalakkersuisut aalajangersinnaapput.

Imm. 3. Piffissap atuinissamik akuersissuteqarfiusup naanerata kingorna piffissaq atorneqartussaq pillugu isumaqatigiittoqarsinnaanngippat Naalakkersuisut aalajangersinnaapput erngup nukinganik innaallagissiorfik Namminersorlutik Oqartussanut akeqanngitsumik tunniunneqassasoq, tak. § 12, imm. 1.

§ 11. Piffissap atuinissamut akuersissuteqarfiusup naanissaa sioqqullugu erngup nukinganik innaallagissiorfiup Namminersorlutik Oqartussanut akeqanngitsumik tunniunneqarnissaa pillugu Naalakkersuisut aamma atuinissamut akuersisummik pigisaqartoq isumaqatigiissuteqarsinnaapput.

Kapitali 5

Tiguisinnaatitaaneq

§ 12. Piffissap atuinissamik akuersissuteqarfiusup naanerani erngup nukinganik innaallagissiorfik Namminersorlutik Oqartussanut akeqanngitsumik tunniunneqassasoq Naalakkersuisut aalajangersinnaapput. Taamaattoqartillugu akuersisummik pigisaqartup erngup nukinganik innaallagissiorfik atortullu tassunga atasut, ilanngullugit sapusiat, ikerasaliat, sulluliat, tasinngortalial, ruujorit, turbinit, pilersuinermit aqqusersuutit il.il., kiisalu inissiat atortullu erngup nukinganik innaallagissiorfiup ingerlanneqarnerani atorneqartut, Namminersorlutik Oqartussanut tamakkiisumik pigineqartussanngorlugit akeqanngitsumillu tunniutissavai.

Imm. 2. Tiguisinnaatitaaneq akuersisummik tunniussinermit aalajangersaavigineqartoq, tak. § 7, Nunatta Eqqartuussiviani nalunaarsorneqassaaq.

Imm. 3. Imm. 1 naapertorlugu tigusinissap aalajangiunneqarneranut atatillugu Naalakkersuisut aalajangiinnaapput, erngup nukinganik innaallagissiorfik tamakkiisumik ingerlasinnaatillugu tunniunneqassasoq, tamatumani imaassimanngippat atugassarititaasut taamaattut atuinissamut akuersisummik pigisaqartumut naleqqutinngitsumik nammakkersuutaalissasut.

Imm. 4. Inatsisartut inatsisaat manna naapertorlugu erngup nukinganik innaallagissiorfiup Namminersorlutik Oqartussanut tunniunneqarnissaa ukiunik pingasunik sioqqullugu, Naalakkersuisut Namminersorlutik Oqartussat tigusinissaannut pisariaqartunik piareersaateqarniarlutik, aammalu ataavartumik ingerlatsinerup ingerlaannarnissaa qulakkeerniarlugu tamakkiisumik akornusersorneqaratillu erngup nukinganik innaallagissiorfimmu atortuinullu tassunga atasunut isersinnaatitaassapput. Tamanna pissaaq atuinissamut akuersisummik pigisaqartumut annertuumik akornutaanngitsumik aningaasartuutaanngitsumillu.

Imm. 5. Erngup nukinganik innaallagissiorfik Namminersorlutik Oqartussanut tunniunneqanngippat, atuinissamik akuersisummik piginnittup sulinini unitsissavaa aammalu erngup nukinganik innaallagissiorfik, maleruagassanut Naalakkersuisut tamatumunnga aalajangersagaannut atugassarititaasunullu akuersisummi aalajangersakkanut naapertuuttumik matusinissaq isumagissallugu.

§ 13. § 12, imm. 1 naapertorlugu erngup nukinganik innaallagissiorfik tiguneqarpat, akiligassat nammagassallu erngup nukinganik innaallagissiorfiup pisussaaffigisai tamarmik atorunnaassapput.

§ 14. Naalakkersuisut erngup nukinganik innaallagissiorfimmik tiguneqartumik attartortitsinissamik isumaqatigiissuteqarsinnaapput. Inatsisartut inatsisaanni matumani aalajangersakkat naapertorlugit attartortoq atuinissamut akuersisummik nalunaarfigineqassaaq.

Kapitali 6

Oqartussaasut suliarinnittarnerat

§ 15. Misissueqqaarnissamut atuinnissamulluunniit akuersissummik qinnuteqaat Naalakkersuisunut tunniunneqassaaq.

Imm. 2. Suliaq Inatsisartut inatsisaanni matumani pineqartunut ilaasoq oqartussaasumit ataatsimit ingerlanneqassasoq Naalakkersuisut aalajangersinnaavaat, aammalu ingerlatsinerup ingerlanneqarnissaa pillugu Inatsisartut inatsisaanni matumani killissarititaasut iluanni sukumiinerusunik maleruagassiorsinnaallutik.

§ 16. Misissueqqaarnissamut atuinnissamullu akuersissummik tunniussinissaq sioqqullugu kommunit kalluarneqartussat oqaaseqaateqartinneqassapput aammalu oqartussat attuumassuteqartut oqaaseqartinneqassapput. Oqaaseqaateqarnissamut piffissarititaasussamik sivikinnerpaamik sapaatit akunnerinik 4-inik sivissussuseqartumik Naalakkersuisut aalajangersaassapput.

§ 17. Akuersissummik qinnuteqartut aamma akuersissummik pigisaqartut paasisutissat Naalakkersuisut Inatsisartut inatsisaat, maleruagassat taanna tunngavigalugu aalajangersarneqarsimasut aamma akuersissuteqarnermi atugassarititaasut naapertorlugit oqartussaasutut suliarinninnerminni pisariaqartinneqartutut isumaqarfigisaat tamaasa Naalakkersuisunut nalunaarutigisussaavaat.

Imm. 2. Paasisutissanik nalunaaruteqartarnermut maleruagassanik Naalakkersuisut aalajangersaasinnaapput, tassunga ilaallutik paasisutissat allagaatinik takunnissinnaatitaanermut maleruagassanut ilaatinneqannginnissaat.

Kapitali 7

Nakkutilliineq

§ 18. Inatsisartut inatsisaat manna naapertorlugu pisinnaatitaaffimmik piginnittup sulineranik Naalakkersuisut nakkutilliisuussapput, aammalu Inatsisartut inatsisaata kiisalu maleruagassat atugassarititaasullu Inatsisartut inatsisaat tunngavigalugu aalajangersarneqarsimasut malinneqarnissaannik peqqusisinnaallutik. Naalakkersuisut eqqartuussisup aalajangiineranik tunngaveqanngikkaluarlutik ilisarnaammik atorsinnaasumik takutitsinermikkut suliap nakkutigineqarnissaanut pisariaqartitsineq tunngavigalugu suliffeqarfimmut tamarmut isersinnaatitaassapput.

Imm. 2. Akuersissummik piginnittup piffissaliussap naleqquttup iluani peqqusissut naammassinngippagu, piginnittup akiligaanik annaasaqaatigisinnaasaanillu peqqusissutaasoq Naalakkersuisunit naammassineqarsinnaavoq.

Kapitali 8

Aalajangersakkat allat

§ 19. Misissueqqaarnissamut imaluunniit atuinnissamut akuersissut Nunatta Eqqartuussiviani nalunaarsorneqassaaq.

Imm. 2. Misissueqqaarnissamut imaluunniit atuinnissamut akuersissummik allamut tunniussineq sunaluunniit, toqqaannartumik toqqaannanngitsumilluunniit pisoq, Naalakkersuisunit akuersissutigineqassaaq.

Imm. 3. Misissueqqaarnissamut atuinnissamulluunniit akuersissut taarsigassarsinermi qularnaveeqqusiissutigineqarsinnaanngilaq, imaluunniit akiligassaqarfiit malersuineranni tunngavigineqarsinnaanani.

§ 20. Misissueqqaarnermut imaluunniit atuinermut akuersissut tunngavigalugu suliaqarnermi ajoqusikkanut akuersisummik pigisaqartoq taarsiisussaataitaanermut maleruagassat nalinginnaasut naapertorlugit taarsiisussaataitaavoq, inatsimmi allami allassimanngippat akisussaaffik annertunerusoq.

Imm. 2. Misissueqqaarnissamut atuinissamulluunniit akuersisummi pisinnaatitaaffimmik pigisaqartup taarsiisussaataitaanerata sillimasiisummik allatulluunniit qularnaveeqqusiisummik matussuserneqarsimanissaa pillugu atugassarititaasunik aalajangersaasoqarsinnaavoq.

§ 21. Susassaqanngitsut erngup nukinganik innaallagissiorfimmumut akuersisummullu atasumi sumiiffimmi inunnit angalaarfigneqarnissaa immikkut ulorianaateqarsinnaasumut isersinnaanissaat pinngitsoorniarlugu iliuusissat pisariaqartut, atuinissamik akuersisummik pigisaqartup isumagissavai.

Kapitali 9

Pinngitsaaliisummik taarsiinertalimmik arsaarinnissuteqartarneq

§ 22. Erngup nukiganit isumalluutini misissueqqaarnerup atuinerullu naammassinissaanut pisariaqartutut isigineqarpat, Naalakkersuisut pinngitsaaliisummik taarsiinertalimmik arsaarinnissuteqarlutik pigisanik pisinnaatitaaffinnillu tunniussisinnaapput. Pinngitsaaliisummik taarsiinertalimmik arsaarinnissuteqarneq, pinngitsaaliisummik taarsiinertalimmik arsaarinnissuteqartarneq pillugu Inatsisartut inatsisaanni maleruagassat malillugit pissaaq.

Kapitali 10

Pineqaatissiissutaasinnaasut

§ 23. Pinerluttulerinermut inatsimmi pineqaatissiissutaasinnaasut malillugit pineqaatissiisoqarsinnaavoq, 1) akuersisummik pigisaqarani suliaqarnermi § 1-imi ilaasunik ingerlatsisunut, 2) atugassarititaasunik § 5 imaluunniit inatsisartut inatsisaat tunngavigalugu maleruagassat aalajangersarneqartut naapertorlugit nalunaarutigineqarsimasunik unioqqutitsisunut, 3) peqqusissutini § 18 imaluunniit inatsisartut inatsisaat tunngavigalugu maleruagassat aalajangersarneqartut naapertorlugit nalunaarutigineqartunik malinninngitsunut, imaluunniit 4) paasissutissanik eqqunngitsunik salloqitaalluniluunniit tunniussisunut, imaluunniit paasissutissanik § 6, imm. 1, § 17, imm. 1 naapertorlugu imaluunniit inatsisartut inatsisaat tunngavigalugu maleruagassat aalajangersarneqarsimasut naapertorlugit oqartussaasup piumasarisaanik nipangiussisunut.

Imm. 2. Unioqqutitsisoq suliffeqarfiuppat, tamakkiisumik ilaannaasumilluunniit naalagaaffimmit, Namminersorlutik Oqartussanit, kommunimit imaluunniit kommunit ataatsimoorfiinit, aktiaatileqatigiiffimmit, pigisaqatigiiffimmit, piginneqatigiiffimmit, assigisaannilluunniit pigineqartoq, suliffeqarfik il.il. taamatut akisussaatinneqarsinnaavoq. Taamatuttaaq unioqqutitsisut tassaappata Namminersorlutik Oqartussat, kommunit imaluunniit kommunit ataatsimoorfii, aamma tamanna atuutissaaq.

Imm. 3. Maleruagassani Inatsisartut inatsisaat naapertorlugu aalajangersarneqartuni maleruagassanik unioqqutitsinerit pinerluttulerinermut inatsimmi maleruagassat naapertorlugit pineqaatissiinermik imaluunniit akiliisussanngortitsinermik kinguneqarsinnaasoq aalajangersarneqarsinnaavoq.

Imm. 4. Maleruagassanik unioqqutitsineq suliffeqarfiuppat, tamakkiisumik ilaannaasumilluunniit naalagaaffimmit, Namminersorlutik Oqartussanit, kommunimit imaluunniit kommunit ataatsimoorfiannit, aktiaatileqatigiiffimmit, pigisaqatigiiffimmit, piginneqatigiiffimmit assigisaannilluunniit pigineqartumit piliarineqarpat, tamanna pinerluttulerinermut inatsit naapertorlugu pineqaatissiisoqarsinnaanera

maleruagassani, Inatsisartut inatsisaat naapertorlugu aalajangersarneqartuni aalajangersarneqarsinnaavoq, tassunga akiliisussanngortitsisarneq arsaarinnittarnerlu ilaapput. Taamatuttaaq pinerluttulerinermut inatsit naapertorlugu pineqaatissiisinnaaneq pillugu maleruagassanik aalajangersaasoqarsinnaavoq, tassunga ilaallutik unioqqutitsineq Namminersorlutik Oqartussanit, kommunimit imaluunniit kommunit suleqatigiiffiannit piliarineqarsimappat akiliisussanngortitsisarneq arsaarinnittarnerlu.

Imm. 5. Akileeqqusissutit Nunap Karsianut tutsinneqassapput.

§ 24. Unioqqutitsineq aningaasaqarnikkut iluanaarutaasimappat, iluanaarutit Kalaallit Nunaanni pinerluttulerinermut inatsit naapertorlugu arsaarinnissutigineqassapput. Arsaarinnittoqarsinnaanngippat, akiliisitsissutissap annertussusilerneqarnerani tamanna immikkut isiginiarneqassaaq.

Imm. 2. Arsaarinnissutit Nunap Karsianut iluaqutissanngortinneqassapput.

Kapitali 11

Atuutilersitsineq il.il.

§ 25. Inatsisartut inatsisaat manna 1. januar 2010-mi atuutilerpoq.

Imm. 2. Inatsisartut inatsisaata atuutilernerani erngup nukinganik isumalluutininik misissueqqaarnissamut atuilernissamulluunniit akuersissutaareersimasut Inatsisartut inatsisaanni pineqartunut ilaasut, piffissami akuersissuteqarfigisimasaminni atuutiinnassapput. Taakkua manna tikillugu inatsit atuuttoq naapertorlugu maleruagassaqartinneqaannassapput.

Namminersorlutik Oqartussat, ulloq 1. december 2009

Kuupik Kleist

/

Jens B. Frederiksen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut